



U P U T S T V O
o stavljanju mandata u mirovanje
i aktiviranju mandata u mirovanju

Sarajevo, maj 2026. godine

Na osnovu člana 2.9 stav (1) tačka 2, a u vezi s članovima 1.8a, 1.8 b i 1.8c Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 51/22, 67/22 i 24/24) i člana 18. Poslovnika Centralne izborne komisije Bosne i Hercegovine ("Službeni glasnik BiH", br. 29/18 i 25/20), Centralna izborna komisija Bosne i Hercegovine je, na 29. sjednici održanoj 06.05.2026. godine, donijela

U P U T S T V O

o stavljanju mandata u mirovanje i aktiviranju mandata u mirovanju

POGLAVLJE I. UVODNE NAPOMENE

Član 1. (Predmet)

Uputstvom o stavljanju mandata u mirovanje i aktiviranju mandata u mirovanju (u daljem tekstu: Uputstvo) regulira se način i postupak stavljanja mandata u mirovanje i aktiviranje mandata u mirovanju zvaničnika izabranih u zakonodavni organ bilo kojeg nivoa vlasti u Bosni i Hercegovini, i to poslanika u Predstavničkom domu Parlamentarne skupštine Bosne i Hercegovine, delegata u Domu naroda Parlamentarne skupštine Bosne i Hercegovine, poslanika u Predstavničkom domu Parlamenta Federacije Bosne i Hercegovine, delegata u Domu naroda Parlamenta Federacije Bosne i Hercegovine, poslanika u Narodnoj Skupštini Republike Srpske, delegata u Vijeću naroda Republike Srpske, poslanika u kantonalnoj skupštini i poslanika u Skupštini Brčko distrikta Bosne i Hercegovine.

POGLAVLJE II. MIROVANJE MANDATA

Član 2. (Mirovanje mandata – član 1.8a Izbornog zakona BiH)

- (1) Lice koje je izabrano u zakonodavni organ iz člana 1. ovog Uputstva mandat može staviti u mirovanje na način kako je to definirano u članu 1.8a Izbornog zakona BiH.
- (2) Za vrijeme obavljanja izvršne funkcije, odnosno vršenja nespojive dužnosti, mandat izabranog lica u zakonodavnom organu bit će u mirovanju, a mandat se dodjeljuje sljedećem kvalificiranom kandidatu s iste liste s koje je izabrano lice s mandatom u mirovanju.

Član 3. (Procedure za postupanje i donošenje odluke)

- (1) Lice koje je izabrano u zakonodavni organ bilo kojeg nivoa vlasti u Bosni i Hercegovini može obavljati izvršnu funkciju za vrijeme trajanja njegovog mandata. Za vrijeme obavljanja njegove izvršne funkcije, mandat lica u zakonodavnom organu ostaje u mirovanju.
- (2) Lice koje je izabrano u zakonodavni organ na bilo kojem nivou vlasti u Bosni i Hercegovini, a na osnovu prethodnog mandata obavlja izvršnu funkciju i odluči da je nastavi, dužno je svoj mandat u zakonodavnom organu staviti u mirovanje prije konstituirajuće sjednice zakonodavnog organa u koji je izabrano dok se drugo lice ne imenuje na istu izvršnu

funkciju ili dok ne podnese ostavku.

(3) Lice iz stavova (1) i (2) ovog člana može podnijeti Centralnoj izbornoj komisiji BiH, na obrascu MM-1, zahtjev za stavljanje mandata u zakonodavnom organu u mirovanje, o čemu obavezno obavještava zakonodavni organ u koji je izabran.

(4) Lice iz stavova (1) i (2) ovog člana dužno je obrazac MM-1 čitko i u potpunosti popuniti te osigurati da obrazac potpiše i predsjednik/predsjedavajući nadležnog zakonodavnog organa vlasti, koji na obrazac stavlja pečat nadležnog zakonodavnog organa, te obrazac, zajedno s aktom o izboru ili imenovanju, dostavlja Centralnoj izbornoj komisiji BiH na nadležno postupanje.

(5) Lice koje podnosi zahtjev za mirovanje mandata isti je dužno podnijeti prije konstituirajuće sjednice zakonodavnog organa u koji je izabrano.

(6) Centralna izborna komisija BiH donosi odluku o mirovanju mandata lica koje je izabrano u zakonodavni organ vlasti i dodjeli mandata sljedećem kandidatu s iste liste s koje je izabrano lice s mandatom u mirovanju, te vodi i prethodni postupak, ako je potrebno, o utvrđivanju činjeničnog stanja.

(7) Mirovanje mandata stupa na snagu petog dana od dana podnošenja pisanog zahtjeva za mirovanje mandata, o čemu Centralna izborna komisija BiH donosi odluku.

Član 4.

(Aktiviranje mandata u mirovanju)

(1) Najkasnije u roku od 8 dana od dana prestanka obavljanja izvršne funkcije, lice koje je stavilo mandat u mirovanje može podnijeti pisani zahtjev na obrascu MM-2 Centralnoj izbornoj komisiji BiH o aktiviranju mandata u mirovanju, odnosno o ponovnom obavljanju svog mandata.

(2) Lice iz stava (1) ovog člana dužno je obrazac MM-2 čitko i u potpunosti popuniti te osigurati da obrazac potpiše i predsjednik/predsjedavajući nadležnog organa vlasti za koji se traži aktiviranje mandata, koji na obrazac stavlja pečat nadležnog zakonodavnog organa, te obrazac zahtjeva, zajedno s aktom o razrješenju s imenovane funkcije, dostavlja Centralnoj izbornoj komisiji BiH na nadležno postupanje.

(3) Centralna izborna komisija BiH donosi odluku o aktiviranju mandata i prestanku mandata kandidatu kojem je dodijeljen zamjenski mandat u roku koji ne može biti duži od 15 dana od dana podnošenja zahtjeva za aktiviranje mandata, i o tome obavještava podnosioca zahtjeva za aktiviranje mandata i lice kojem prestaje dodijeljeni zamjenski mandat.

Član 5.

(Početak trajanja zamjenskog mandata)

Članu organa vlasti kojem je dodijeljen mandat, umjesto člana organa vlasti kojem je mandat stavljen u mirovanje, iz člana 3. stav (2) ovog Uputstva, mandat teče od dana stupanja na snagu mirovanja mandata iz člana 3. stav (7) ovog Uputstva.

Član 6.

(Privremeni zamjenski mandat)

(1) Ukoliko izabrani član organa vlasti koji je mandat stavio u mirovanje podnese zahtjev za aktiviranje svog mandata, privremeni zamjenski mandat koji je dodijeljen sljedećem kvalificiranom kandidatu s iste liste prestaje.

(2) Ukoliko izabranom članu organa vlasi koji je mandat stavio u mirovanje mandat u mirovanju prestane, u skladu s članom 1.10 Izbornog zakona BiH, privremeni zamjenski mandat koji je dodijeljen sljedećem kvalificiranom kandidatu s iste liste smatra se redovnim zamjenskim mandatom, u skladu s članovima 9.10, 9.12h, 10.8, 10.17, 11.8, 11.14 i 13.6 Izbornog zakona BiH.

(3) Ukoliko kandidat koji ima privremeni zamjenski mandat stekne pravo na redovan zamjenski mandat zbog prestanka mandata drugog kandidata na listi u smislu člana 1.10 Izbornog zakona BiH, privremeni zamjenski mandat se dodjeljuje sljedećem kvalificiranom kandidatu s iste liste s koje je izabrano lice s mandatom u mirovanju.

(4) Ukoliko kandidat koji obavlja privremeni zamjenski mandat umjesto lica koje je stavilo svoj mandat u mirovanje s liste za dodjelu kompenzacijskih mandata stekne pravo na zamjenski mandat s redovne kandidatske liste, zamjenski mandat lica s kompenzacijske liste koje ima mandat u mirovanju dodjeljuje se sljedećem kvalificiranom kandidatu s iste kompenzacijske liste s koje je izabrano lice s mandatom u mirovanju.

(5) Kandidat koji obavlja privremeni zamjenski mandat umjesto lica koje je stavilo svoj mandat u mirovanje, ne može svoj privremeni mandat staviti u mirovanje.

(6) Ukoliko odgovarajuća kandidatska lista ostane iscrpljena, u slučaju prestanka mandata ili stavljanja mandata u mirovanje, mandat narednom kandidatu dodjeljuje se u skladu s odredbama Izbornog zakona Bosne i Hercegovine i drugim podzakonskim aktima.

POGLAVLJE IV. PRELAZNE I ZAVRŠNE ODREDBE

Član 7.

(Sastavni dio ovog Uputstva)

Sastavni dio ovog Uputstva su:

- a) Obrazac PPU-1 – Izjava o prihvatanju ili odbijanju mandata,
- b) Obrazac MM-1 – Zahtjev za stavljanje mandata u mirovanje i
- c) Obrazac MM-2 – Zahtjev za aktiviranje mandata.

Član 8.

(Upotreba izraza u muškom i ženskom rodu)

Riječi koje su radi preglednosti u ovom Uputstvu navedene u jednom rodu, bez diskriminacije se odnose i na muški i na ženski rod.

Član 9.

(Stupanje na snagu i objavljivanje u službenim glasilima)

Ovo Uputstvo stupa na snagu danom donošenja i bit će objavljeno u “Službenom glasniku BiH”, “Službenim novinama FBiH”, “Službenom glasniku RS”, “Službenom glasniku Brčko distrikta BiH” i na internet-stranici Centralne izborne komisije BiH www.izbori.ba.

Broj: 05-1-02-2-722-1/26

Sarajevo, 06.05.2026. godine



Predsjednik

Ševan Kalaba





U skladu s članom 1.3a stav (3) Izbornog zakona Bosne i Hercegovine, izabrani nosilac mandata, izabran na neposrednim/posrednim izborima, daje

Izjavu o prihvatanju/odbijanju mandata

Ovom izjavom potvrđujem da ja, _____,
(Ime, ime jednog roditelja, prezime)

- prihvatom
 odbijam (staviti oznaku "X" u odgovarajući kvadratić)

mandat u _____,
(naziv organa u kojem se mandat dodjeljuje)

Razlozi za odbijanje mandata su sljedeći (u slučaju odbijanja mandata):

Broj telefona za kontakt:

Datum:

Mjesto:

Potpis:



Zahtjev za stavljanje mandata u mirovanje

Na osnovu člana 1.8a Izbornog zakona Bosne i Hercegovine, podnosim zahtjev za stavljanje u mirovanje mandata u zakonodavnom organu, iz razloga obavljanja funkcije u izvršnom organu, te prihvatam da za vrijeme mirovanja mog mandata u zakonodavnom organu mandat bude dodijeljen sljedećem kvalificiranom kandidatu.

Izabrani član zakonodavnog organa:

_____ (ime i prezime izabranog člana zakonodavnog organa koji podnosi zahtjev)

Zakonodavni organ:

_____ (naziv političkog subjekta i zakonodavnog organa u kojem ima mandat)

Izvršni organ:

_____ (naziv izvršnog organa i izvršne funkcije na koju je imenovan)

Akt o imenovanju (ovjerena fotokopija):

_____ (naziv akta koji se prilaže zahtjevu i na osnovu kojeg se podnosi zahtjev)

_____ Mjesto i datum

M.P.

Potpis podnosioca zahtjeva
i broj telefona za kontakt

Potpis predsjedavajućeg
zakonodavnog organa

Napomena: Mirovanje mandata stupa na snagu petog dana od dana podnošenja pisanog zahtjeva.

Obrazac MM-1



Zahtjev za aktiviranje mandata u mirovanju

Na osnovu člana 1.8b stav (1) Izbornog zakona Bosne i Hercegovine, podnosim zahtjev za aktiviranje mandata u mirovanju u zakonodavnom organu.

Izabrani član zakonodavnog organa:

_____ (ime i prezime izabranog člana zakonodavnog organa koji podnosi zahtjev)

Zakonodavni organ:

_____ (naziv političkog subjekta i zakonodavnog organa u koji je izabran)

Izvršni organ:

_____ (naziv izvršnog organa i izvršne funkcije na koju je bio imenovan)

Akt o razrješenju imenovane funkcije (ovjerena fotokopija):

_____ (naziv akta koji se prilaže zahtjevu i na osnovu kojeg se podnosi zahtjev)

_____ Mjesto i datum

M.P.

Potpis podnosioca zahtjeva
i broj telefona za kontakt

Potpis predsjedavajućeg
zakonodavnog organa

Napomena: Pisani zahtjev podnosi se Centralnoj izbornoj komisiji Bosne i Hercegovine najkasnije u roku od osam dana od dana prestanka obavljanja izvršne funkcije.